

Remitido

Kico den realidad a haci cu Vaticano a royeer pader Lampe?

Den e periodo di mas di 2000 aña atras tabata e Farizeonan y e Saduceonan kendenan tabata representa e religion organisa. E tempo ey for di Nazaret a sali un persona bon prepara y cu sabiduria di altura, kende a bin confronta e religion aki y tabata muestra nan riba nan enseñanza falso y nan estilo hipocrita di bida.

Den e tempo ey hopi di e religiosonan cu tabata pertenece na e organisacion aki a bandona nan religion pa sigui e enseñanza di e Nazareno, kende despues a keda crucifica pa su mes un pueblo cu a keda indoctrina dor di e Farizeonan y e Saduceonan. Entre esnan cu a bandona e religion Hudiu aki nos ta reconoce San Pablo.

Pader Lampe un par di aña atras a yega di declara den un articulo cu el a publica y a cita cu ‘papa di Roma no ta sucesor di San Pedro y tampoco representante di Dios aki na mundo’. Pader Lampe tambe a enfatisa den e articulo aki cu mester stop cu enseñanza falso

riba e topico aki.

Un par di aña despues, pader Lampe kende tabata ser mira den su Iglesia di ta un religioso critico a rebiba su sentimento y frustracion cu e a experiencia dor di a sigui bida di e.o. obispo Romero kende pa motibo di a sali na defensa di e pueblo oprimi di San Salvador y contra e inhusticia social y corrupcion gubernamental di e pais aki a keda finalmente asesina pa militarnan durante cu e tabata celebra un sacrificio di misa.

Pader Lampe den su intento pa sostene e lucha contra e inhusticia cu tabata sosode cu e trahadonan di Telefoon Dienst, a keda acusa di ta complice na e accion cu a bay for di man y a keda encarcela. Pues pader Lampe a experiencia den carni y weso kico ta opresion di esnan na poder y recordando e trabao cu obispo Romero no a termina na su pais, pader Lampe a lanta su partido pa duna asina e pueblo di Aruba un opcion nobo pa haci otro escogencia.

Un posibilidad pues pa pueblo por scoge entre e politica tradicional den cual inhusticia social y corrupcion gubernamental ta tuma luga of un politica cu ta garantisa un gobernacion cu den realidad ta basa riba interes general di pueblo, cual ta e prome prioridad di cualkier gobernante integro.

Nos por corda con un ex minister a trata di influencia nos obispo pa e pone un paro na e actividadnan di pader Lampe. Tambe tabatin mas politico tradicional cu a haci e mes un intento aki pa asina salvaguardia e sistema tradicional cu ta permiti enrikecimiento propio di e politiconan aki cu ta bay a costo di sufrimento di esnan mas den necesidad.

Pueblo den eleccion di 2005 a duna pader Lampe un asiento den parlamento y manera nos tur por a experiencia con na un manera baho, vil y insistente e politiconan tradicional a uni forsa pa mancha number di e pader aki y finalmente

a logra di convence parti di su siguidonan y consecuentemente pader Lampe a perde su asiento den Staten na e eleccion di 2009.

No mas cu 6 aña pasa cu Vaticano pa medio di su embahador den region kende a bin Aruba den su jet priva solamente pa hala atencion di e pader aki y a dun’e solamente un siman di tempo pa scoge pa ta un parlamentario of keda eherce su trabao di Iglesia como pader. Den e ocasion aki e embahador aki a bisa pader Lampe literalmente **“YOU ARE A BAD PRIEST”** y como motibo di e expresion aki e a declara cu pader Lampe no ta tene su mes na reglanan di Vaticano.

Awor porfin na un manera fini ta royeer pader Lampe como pader y ta declara cu hamas e por haci e trabao religioso pa cual el a ofrece su bida desde su adolescencia.

Pesey lo ta bon pa puntra nos mes, si ta pasobra cu pader Lampe a sali na vanguardia di

un pueblo oprimi pa un sistema politico caminda pueblo dor di indoctrinacion mes ta participa na oprimi su mesun hendenan, cu esaki segun moda di husga di Vaticano ta un delito mucho mas pisa cu ora sacerdotenan ta comete actonan di pedofilia? Pasobra segun mi ta entendi cu den tal caso e ‘criminalnan’ aki ta haya un of otro trabao den Vaticano of ta keda translada pa otro sitio, caminda pueblo no ta na altura di nan actonan bergonsoso.

Finalmente ta surgi e pregunta: “Cual poder Papa y Vaticano ta representa na mundo anto?” Esnan cu por contesta e pregunta aki por tambe comprende pakico e titulo di e articulo aki.

Mario Lopez

Nota di Redaccion: E remitido aki ta wordo publica riba peticion di un lesado di Bon Dia Aruba. Bon Dia Aruba no ta responsabel pa e contenido. □